

# Tiga lawan sokong 2M

**KUALA LUMPUR, Sabtu** — Tiga pemimpin parti pembangkang dari tiga parti yang berbeza, pada keseluruhannya bersetuju dan memuji dasar pentadbiran kerajaan pimpinan Datuk Seri Dr. Mahathir dan Datuk Musa Hitam (2M).

Yang Dipertua Agung PAS, **DATUK MOHD. ASRI HJ. MUDA** berkata kepimpinan 2M yang

baru diharap dapat membawa perubahan dan pembaharuan politik "Kerajaan 2M ini lebih baik daripada kerajaan yang terdahulu".

Menurut beliau, orang politik mungkin mengatakan lawatan Dr. Mahathir ke negara-negara Arab sebahagian dari strategi pilihanraya. Bagaimanapun, PAS memang amat bersetuju dengan usaha mempereratkan hubungan dengan negara-negara

Islam.

"Begitu juga mengenai penubuhan Universiti Islam. PAS tetap menyokong usaha murni ini. Syukur! Ini suatu kesedaran kerajaan. Kita sendiri tidak akan menjadikan Universiti Islam ini sebagai isu pilihanraya."

Setiausaha Agung DAP, **ENCIK LIM KIT SIANG** pula berkata dalam banyak hal, "pentadbiran 2M patut dipuji khususnya tindakan

membebaskan orang-orang yang ditahan di bawah Akta Keselamatan Dalam Negeri."

Beliau juga menyebut yang 2M adalah lebih bersih. Kalau tidak kenapa laporan Juruodit Negara yang mendোধkan penyelewengan dan salah pengurusan kewangan di beberapa jabatan kerajaan, dibenarkan disiarkan oleh akhbar.

Menurut Encik Lim, dasar 'melihat ke Timur' memang tindakan yang bijak, tapi pandanglah dari segi positifnya. Orang Jepun kuat bekerja, kita juga patut mencontohi mereka.

Menurut Pengerusi PSRM, **ENCIK KASSIM AHMAD**, dasar Kerajaan Dr. Mahathir yang mahukan sebuah kerajaan yang bersih, cekap dan licin, "umumnya kita alu-alukan." Bersih daripada segala bentuk rasuah, penyelewengan, cekap menjalankan tugas dan ikhlas berkhidmat untuk rakyat.

Lawatan Dr. Mahathir ke negara-negara Islam, baru-baru ini, memang kita alu-alukan. Kita perlu bukan sahaja bersahabat, malah bekerjasama dengan lebih banyak negara. Penubuhan Universiti Islam Antarabangsa seperti yang diumumkan, pada prinsipnya sangat sesuai dengan keadaan dunia hari ini, kata Encik Kassim.

"Bagaimanapun, setakat ini, saya tidak boleh cakap sama ada untuk optimis atau pesimis terhadap dasar pentadbiran Dr. Mahathir. Ini bergantung kepada apa yang Dr. Mahathir dan Datuk Musa akan buat dalam masa setahun akan datang, terutamanya setelah mereka mendapat mandat baru dari rakyat dalam pilihanraya ini."

Mungkin ada faktor yang timbul untuk mereka membuat beberapa perubahan yang lebih baik, yang akan menguntungkan rakyat umumnya, kata pemimpin PSRM itu.

Ketiga pemimpin pembangkang itu juga memberikan pandangan mereka berhubung dengan pilihanraya ini dan matlamat parti-parti pembangkang. Segalanya ini terkandung dalam wawancara khas yang disiarkan oleh **D E W A N MASYARAKAT** keluaran terbaru.

Bahan asal dari Arkib  
Negara Malaysia

624  
369/85